

銅梁山人詩集

序

壬子春見鎮之先生於上谷出眎均堂詩集卷一
又從丁學博淦泉所借鈔長水集一卷爲先生寓
檇李時作錢文端公於先生有快壻清才之目尤
心賞其詩每一篇出輒長吟數四幾於放先生出
一頭地今集中所抄皆香樹老人口沫手胝碎壺
擊節者也是時先生年甫冠而根源盛大已欲突
過前人至均堂集則守保定以後之作出入風騷
醞釀經濟圓渾超脫聲實相中置之六代三唐作
者之林可以獨當一面如筠鈍不能詩恨不早從

先生遊提鉛握槩垂十年訖無所成今始得問津
大方得先生詩奉以爲鴻寶之秘遂合鈔二集爲
編凡四卷又先生自言通籍後自爲郎迄作郡有
藤花集玉脂山房集若干卷皆不欲自存而謬爲
朋輩傳寫又嘗撰易林注漢書考證諸書及星象
勾股闡述之言不下數十卷但脫藁卽皆焚去散
軼者不獨詩也嗚呼此可以見先生之志矣以先
生之淹通奧衍加以什伯古人之才識顧於馳騁
翰墨則曰聊適已事而已詎可覆帚可享無毫髮
加損於心今世膚學之士纔學操觚便思以梨棗

自壽人知之則以爲喜不知則以爲憂醜然號於
眾曰是區區者吾將藉以傳也聞先生之言當亦
立咫尺焉汗浹衿也乾隆壬子三月朔大庾後學李
如筠序

序

詩者志之所之詞者意之所達上以表

君父之恩際下以紀生平之歷游然而一代蘭交
同時石友無不並垂題詠兼載譜年是以吉甫作
頌而申樊並傳子建賦詩而徐劉咸在杜陵之感
嘉郡有蜀川人日之詩山谷之和東坡爲天上玉
堂之作蘭亭之遊不再感慨係之醉翁之客僅存
悲歡何限貴不忘賤拓金戟而懷人愛益思傳附
青雲而朗詠大中丞鎮之先生清德象賢詞宗快
婿羊祜尋鑲之歲不侍高牙陸雲對解之年薄游

長水時則令外舅錢文端公林下耽蟬家居扶鹿
書傳王粲卓犖驚人詩勛昌黎縱橫不世夜繙諸
史篝燈范母之前曉和千篇瑰佩秦甥之館宗伯
沈歸愚先生八旬耆會二老同游攜五六人酌方
員水命和竹爐之什立揮石銚之笏宗伯標題定
爲第一訂交任昉湖泛鴛鴦結契徐陵樓登煙雨
此長水集之所爲作也旣而偕登蕊榜獨步藤廳
選郎筦澄敘之方銓政仰冰衡之寄公則顏竣嚴
毅裴楷清通餽遺不受餅飧公謙只談風月屢排
廷衆取重相臣時則程魚門錢南園任子田沈南

雷鄭秋浦陳伯思諸先生或侃侃居官或鏗鏘談
道圖中九客都爲日下畸人座上千言時有雲樓
佳句於是有藤花集公玉脂一硯傳自先公義同
韋相之經廉比隱之之石眸齡分授處處相隨素
質彌堅朝朝染翰於是有玉脂集公出守襄國旋
調會城錯節相貽棼絲待理武郡方資廉范漁陽
早倚張堪幾無聯句之間但有行春之作然而謝
庭賦雪不乏鴻篇庾閣吟宵尤多稚興王陽明橫
戈捕盜卽爲講學之時黃次公露冕觀風未廢談
經之事哭親朋於千里天涯之傾蓋難忘感陳迹

於五言前日之雨花曾憩於是有坳堂集公廉操
銘於

宸扈治績達乎

主知長孺甫輟而復庸子文旣已而還仕分符上
谷感

恩親誨疲氓建節天雄化俗仍操勅旅露堂肄射
白金鑾亦解談兵雪積催軍周公瑾偏能橫槊豈
獨王祥佩刀興懷同氣張華說劍遠憶故人而已
哉於是有居庸集恆山集公

眷重

兩朝恩邀

特擢星於北下袞繡東來懸皎鏡而增寒照明湖
而倍澈趙康公之讞獄何暇憩陰于定國之持平
幾勞達旦官廚易冷每聞寒典冬衣上客同飢祇
合晨餐秋爽瑯邪之刀五尺久換耕犁東蒙之翳
幾重不煩柯斧幸承風者二載拜臨別之一言於
是有華不集嗟乎鳳翔雲遠戀德常難鶴警

天聞拜

恩何速正揚清於東國爰布澤於南江簇蠶則民
俗先謠歛乃則棹歌能譜賃花成曲千枝豈植庭

中飲水論心一掬謾勞僧送院江何幸溫公之節
早臨靈澤相望范相之篇爭紀於是有具區集公
甫駐此邦適逢偏旱告災請賑屢荷恩言察吏巡
臺宣傳民頌電掃而清伏莽風馳而息桂荇除宵
哦雨雪之途千里唱淮淝之捷此則雖未成編已
聞傳誦者也若夫詞也者玉田旣往春水空流淮
海不存微雲誰領訪晏殊之珠玉尋謝逸之溪堂
酒邊常有新詞花間豈無傳集然而白石乃詞中
之杜甫東坡爲樂府之鮑昭公則氣挾大江超同
疎影西冷一闕竭來五百松風南浦數音何處卅

陂飛雨迎秋送暑俱堪填付小紅檣燕江蛩聞亦
寄聲梅子蓋公詞之肖姜夔猶公詩之宗韓愈酒
酣高唱可過行雲旅夜清吟能驚山鬼有其似之
無不及矣於是有玉脂詞蓮果詞華不詞焉凡茲
十有一編都爲二十六卷比燕公之全集已益一
緘待文正之續編卽盈卅帙惟公博物優於蒼雅
識字過於爰將句成每壓賓筵稿佚還存友橐而
復風流獎後慷慨論交雀厦知歸龍門願託梧昔
從兄武昌竊窺風範兄謂梧曰銅梁昆季天下之
偉人也及從政岱陰服官麾下真覩伯夷之行早

登茂叔之堂豈圖疾引方來飢驅又去預聞韶於
大國累月無違陪講德於編氓長言未足

嘉慶八年歲在昭陽大淵獻新安後學東蒙屬吏
洪梧拜手謹序

序

文能載道詩書偕功德俱傳歌以永言竹素與鼎
鐘同壽吹九霄之磬咳鳳凰鳴而百鳥知歸扶萬
丈之光芒泰華立而羣峯爭仰調聲叶律聽鈞天
廣樂之音猛簾洪鐘奏清廟明堂之響然而處士
乏江山之助大官多簿領之勞苟非具鉤河摘洛
之才散錦橫珠之質奚能凌轢崔蔡控駕齊梁七
字成而金石流聲雙旌指而山河壯采用是軒轅
帝載喜起皇風政如蘇白亦號詩人賢若皋夔原
稱才子名斯盛矣遇亦隆焉

大中丞鎮之先生華望烏衣清風虎節開府則人
稱濟美趨庭則瑞掇駢枝英華咀兩漢之精腴潤
擷三唐之秀東牀奪席舊傳夜半之衣西蜀多才
新浣江邊之錦爲詞宗之快壻冠多士以芳名薄
遊而長水成編觸緒而短歌寄興經貽韋母剔殘
几案篝燈宅館秦甥吟遍樓臺煙雨旣而班聯玉
筍宿映銓曹四友以柏馬成奇九客與藤花並燦
香煙朝罷唾地立就三篇珠玉吟成刻燭尙留一
寸而且撫墨光於手澤石硯摩挲摘藻采於心源
玉脂溫潤洛下一朝紙貴平原五色絲多或似迴

風飛絮吹入中書省來或如密字眞珠攜上孝廉
船去此又蚌胎之隱現需時寶器之升沈有數耶
迨夫五馬一麾仍復千言疊唱楊柳行春之地景
不空描旌旗按部之時語皆成韻凝香燕寢韋蘇
州畫戟森嚴妙詠汀洲柳吳興白蘋風雅蹙奔麋
於恆水雪帳親勞揚輕旆於潞河玉弓纔挂坳堂
一集此其選也已乃恩旣承乎前祓任尤重於封
圻談兵而豪溢眉間振旅而歡騰閭左居庸集韜
鈴馬上猶傳紫萸黃菊之篇恆山集碧玉壺中不
乏水月雨花之句於是揚鑣上谷移節東蒙玉局

則跡表湖山漁洋則鄉稱桑梓旋來旬於南國爰
問俗於春郊山川以吳會爲名區財賦以江鄉爲
重地公迺擁芙蓉而豔若對琴鶴以道然譜款乃
之數聲領中冷之一勺猶復煙墨受召金絲引和
歷萬灌而劍乃稱神經九轉而丹逾見寶論文章
於庾信老去更成推格律於杜陵晚年益細則華
不具區又煌煌其成集也維公皖江再蒞於今三
年百室呼庚喚咻而登衽席千山聚米談笑而掃
欃槍鄴架香清依然運甓庾樓月白不廢雅歌或
皆斯編所未及傳抑亦猶他樂之未敢請乎夫賡

歌雲日咸仰昌期唱和柏梁允稱盛事應入宣尼
之采直登表聖之門莫不戶習揣摩人知楷範公
以綺年而稱名士壯歲而佐清時俗茂風醕研精
覃思言敷丹陛化作祥風墨染黃麻都成甘雨眞
太平之潤色足鼓吹於休明也已至於詩餘三集
附以偕行譜樂府之新聲續天孫之餘錦香絃欲
語綺思將飛重翻白雪之歌并寫烏絲之帖則又
柳耆卿姜白石諸賢所當避席者也銘借地階前
服官麾下奕奕軍門之榮幸許登龍翩翩荆樹之
花曾容附驥佛以因緣爲重儒稱遭際之榮捧郵

箋之飛遞暗剔乾螢排玉軸以徐繡洞窺全豹香
傳梅閣書萬本而手欲生胝詩咏蘭亭附巨製而
名期不朽嘉慶十年正月旣望皖江屬吏宋鎔謹
序

國史列傳

王汝璧四川銅梁人乾隆三十一年進士分吏部學習三十六年正月補主事十一月陞員外郎三十八年截取

記名以繁缺知府用四十年四月陞禮部郎中經吏部奏留八月補吏部郎中四十四年丁憂回籍四十七年服闋四十八年七月仍補吏部郎中八月授直隸順德府知府四十九年調保定府知府五十五年因承審直隸建昌縣盜犯馬十等行劫錢鋪一案經巡視西城

御史拏獲隨同行刼之王二入奏

諭將獲犯馬十解交軍機大臣嚴審並以王汝璧於刼盜重情接到委牌案懸多時並不親訊其不是更大著歸案質訊旋經審明奉

旨革職發往軍臺効力尋蒙

恩准贖罪降補同知五十六年四月署宣化府同知五十八年三月授正定府知府九月陞大名道嘉慶四年二月陞山東按察使十月會同布政使全保參奏德平縣知縣葉芳浮收漕糧釀成重案請將葉芳革職並自請處分

奉

旨交部議處

諭曰此案重大自應一面親往查拏一面迅速馳奏乃僅照尋常事件用三百里驛遞遞到在直省之後尤屬不知輕重緩急全保王汝璧俱係朕甫經擢用之人於地方要件何得疎玩若此著傳旨嚴行申飭嗣經部議降二級調用奉

旨准抵銷五年閏四月遷江蘇布政使六年三月護理江蘇巡撫十二月授安徽巡撫七年五

月奏潁州府地處省北邊境附府之阜陽縣
幅員遼濶與豫省之固始息縣新蔡項城沈
邱五縣毗連犬牙交錯兩省奸匪逃竄最易
潛匿查該縣之驛口橋集水陸交通路徑錯
雜應添設督捕同知一員專司緝捕并應酌
設營汛移撥弁兵以資巡緝下部議行八月
湖廣總督吳熊光等奏楚省應需兵米請於
安徽湊足十萬石解楚接濟

上以本年安省有缺雨之處糧食未必充裕
諭汝璧酌量情形或稍減數萬石亦無不可總須

於市價民食不致妨礙方爲妥善尋奏楚省
軍需重大自當如數派撥惟是水次各屬本
年缺雨之處較多其存倉穀石似應酌量留
貯以備碾糶現在各屬糧價稍增亦不便再
行採買致妨民食查嘉慶二年安徽省曾經
碾米六萬石運解湖北今請照案碾動六萬
石分起趕運所有減存米四萬石卽留爲各
該縣借糶之用

上嘉之如所請行十月奏太湖縣續報成災地畝
懇請一體緩征並將勘報遲延之府縣請

旨議處

諭曰向來各督撫查辦災賑事宜於業經奏報後遇有續行查出災區往往迴護屬員稟報遲延之咎遂將小民病苦置之不問今王汝璧將勘報遲延之府縣據實叅奏所辦甚是太湖縣知縣高薰業及安慶府知府樊晉均著交部議處十二月因宿州匪徒戕官滋事帶兵馳辦尋奏勦辦淨盡將本標後起兵三百名先行撤回歸伍

上是之八年閏二月

上以汝璧年力就衰改授內閣學士十二月授禮部右侍郎旋改授安徽巡撫九年六月具題買補倉穀本內字句疎率交部議處八月奏請清查安省倉庫分別追補定限四年全行完補得

旨允行旋經藩司邵洪奏請展限六年復諭汝璧安爲籌酌九月覆奏彌補章程以各屬情形每年覈其盈餘節省彌補前奏定限四年實屬有贏無絀無須再爲寬限

上是之十二月授兵部左侍郎十年調補刑部右

侍郎十一月因病請開缺
恩准回籍調理十二年七月卒

銅梁山人詩集目錄

渝江王汝璧鎮之

長水集 卷一 卷二 卷三

藤花集 卷四 卷五

居來集 卷六

均堂集 卷七 卷八

居庸集 卷九 卷十 卷十一

恆山集 卷十二 卷十三 卷十四

卷十五 卷十六 卷十七 卷十八

卷十九 卷二十

華不注集 卷二十一 卷二十二

具區集 卷二十三

皖山集 卷二十四 卷二十五

銅梁山人詩集卷第一

渝江王汝璧鎮之

長水集

汝璧生甫晬而孤依母存活衣食給於鍼黹
織紵以供鉛槧每黽出就外傳夜歸坐紡車
側背誦經書青檠熒然寒影相向茹荼集蓼
十有八年庚辰春出贅婦家奉母僑居長水
外舅錢文端公割宅以居昕夕就文端公討
論古今學識日有進先是所爲詩多羈孤
愁恨之音至是悉屏去一以中正和平爲則

每有歌詠文端公輒歎賞曰老夫弱冠時未能過此也壬午舉京兆試癸未下第南還汗漫江湖間作詩不下數百首隨手散佚者十之四五又自以卑弱不足錄者汰之過半存一百四十一首釐爲三卷曰長水集問字長水之年志不忘也

善哉行

去日如何遐哉逝波來日遲遲我謠且歌出日入月動煦息叱怡怡迺躬厥惠旣多酣酒炙肥棄德則那洪厓浮邱孰知其他元化貞貞庶彙雅雅率

由天庾貧賤亦可決一勺水流爲江河高步罔知
顧影則蹉井渫之食蠲彼泥苴華鄂之粢篤我根
芽

西門行

出西門步念之留浮景颺輪馳單衣負薪負薪行
安之擣藥爲齋鬻石爲糜當憂而樂長笑當悲上
堂拜我母還顧妻與兒寒烏啁啾載集載飛廉吏
子孫貧賤困窮命所施廉吏子孫貧賤困窮命所
施云何敢言兢兢奉前徽同心好修樂我壘簞

東門行

出東門平慎歸一僮粟月以支一稊絲歲之餘來
日良難子將奈何顧語親交樂哉我饑鐵鎚欲折
戟編以韋穆穆遂古及于今茲仰視皇穹蓋天俯
擊土鼓康衢煌煌鉤鈴星炳焜璿與璣下土忻忻
當食貧此時下土忻忻當食貧此時百昌蕃滋其
榮其腓葆茲寸莖永賴春祺

擬迢迢牽牛星

迢迢牽牛星上將居中央左右列兩旗玉帳何堂
堂機槍亦已滅枉矢不敢張跂彼雲漢女終日勞
七襄織錦爲戰袍織素爲旂常書銘耀日月被服

生威光願郎策大勳麟閣圖輝煌豈不勝七夕靡
靡鵲駕梁

擬庭中有奇樹

庭中有奇樹枝葉何葳蕤上柯棲鳳鸞下根盤蛟
螭高高凌霄花如附蘿與絲不知幾百歲篤此冰
霜姿匠石不得顧盤攫而支離白日藉嘉蔭夜月
宿留之軒然雲霞蟠永與松喬期我無相思人折
之將遺誰

擬明月何皎皎

明月何皎皎孤光入我幃懷古不能寐起視攬清

輝中庭寂無聲露下霑我衣烏鵲匝樹飛驚詫棲
無枝飛蟲自翺翺幽景相因依人生貴知足淡定
氣乃奇本無金石堅強作山嶽思千秋百歲後素
月悲金罍

擬涉江采芙蓉

涉江采芙蓉集爲裳與衣綴以明月珠織以鮫人
絲世人苦不識疇敢服此奇借問被服誰湘君與
冰夷哀哉楚靈均從之何太悲蘭澤生眾芳何處
遺所思丈夫貴一心奚用遠致爲

夏夜讀書呈家兄士會

凍雨忽已過，牕戶含餘烝。倦雲積天角，浮波生玉繩。
蛛絲下敗網，蝸迹緣癡蠅。泠然夕景入，漸可羅衣勝。
暝合流響聚，幔卷空烟凝。分光理舊簡，幽尋驗前徵。
邁征抱篤摯，虛契識依憑。眇慮欲遺想，在感猶奮興。
石鉤咽殘漏，砌蟲遞微聲。怯膽信神鑒，佳氣生眉稜。
夙夜獨兄弟，古今無愛憎。卽此得真意，未易喻良朋。

寓齋口號

爛烝紅飯煮青蒲，笑典春衣看賣珠。牕草芊蒙高似屋，樵青煙眼泣風鑪。

碌碌要爲門戶計依依如覺別離難
攜來夢草池塘句促就簷花雨夜看

雞冠花歌

脰脰膊膊風葉號磊磊落落花冠高花神絳幘雲
錦縑頭上殊有威鳳毛祝雞老翁舊相識尸鄉干
樹皆手植雲機剪落秋星搖朱公魂返籬根黑忽
驚檐際生細縕青鳥銜來赤羽幡涼秋那得火繖
起長空燒破齊煙痕桃都山在何許踐鳥翻翻秋
欲暮獨立斜陽寂無語可能飛上扶桑巔朝朝羽
衛羲和馭不然夜深玉鏡開塵函凌風舞向秋空

去

夜坐

夜氣浩如水霜月冷欲滴寒飈何處來吹之過東
壁流響沉虛堂暗蛩織古甃殷憂環無端有酒不
能喫

壬午正月四日訪宮守陂寓齋出舊臘雪中
用東坡聚星堂韻禁體詩見示次韻奉和

膠泥菜甲未吐葉臘雪不已復春雪迎年街鼓聲
欲沉望歲村農笑不絕已聞百里澤腹堅更判幾
量屐齒折凍鱗赴壑走且僵飛爪印泥明復滅競

君硬語排嚴冬八手一片冷光掣看騎生馬搏長
蛇攬岸厯山但眼纈急觴快倒清若空深談劇好
罪如屑偶然話到凌雲遊鏡裡裁眉想飄瞥看雲
句好山何慙君言有詩數章寄令弟虛谷太守鐫嘉州大佛巖上歸家夢冷
吾空說未能袖手還強吟料峭寒聲撞簷鐵

曩同士會兄偕錢士季過守陂飲戲語云不
速之客三人來守陂續成十六韻索和時予
兩人將應京兆試守陂與士季亦俶裝往謁
選人次韻奉酬并代錄別

不速之客三人來昆侖方壺何壯哉遽遽未醒御

風去連旌結股誰仙才別後索居十日雨日日愁
望頑雲開紛綸意緒重棖觸兀坐不語魚鉤顚黑
甜一枕日亭午家山萬點青韃毳長鬚火急報新
詠打門更迭驚鷗雷拄頰揩眼百回讀終日不嘆
號如孩頗念小子太狂簡成章安得夫子裁三年
淹留越女笑到處茗芋吳兒哈滑稽壺腹亦國器
底須屑屑爭瓶罍晨雞不惡醉起舞玉山未倒松
不摧兩君辛勤求祿養俯給妻子仰耆台而我齷
齷寄芻秣鹽車那得重銜駘出門漫向輓紅笑便
當高舉翬煙埃尙愛南湖潑釀淥眼前且築糟邱

臺浮雲前路望莫極新黃早放天街槐

嚴瀨舍舟入胥口雨中山行卽目成歌

蒲帆幾日飽風雨行雲送我入山塢厓奔谷複陰
磴送天空縹緲修眉嫵仄磨劍淬騰猿公空巖花
落下鹿女攬人奇樹臂突伸壓虛危广頭深俯紺
乳溶溶古竈封白石鄰鄰亂泉煮人間何處非蘧
盧山中信美卽吾土峯腰忽得小平處一畝之宮
數弓圃便當抱甕謝桔槔誰使歸雲爭子所遙指
前山雨腳收有人叱犢相爾汝明知村路接朱陳
疑有仙巢住茅許眼前好景望不窮欲攬全勝意

多阻更緣花氣過前溪叩門求飲誰乞予

題墨梅

虬雲鬱輪囷冷月照幽素沙水光泠泠疏影印回
互相逢綠衣人微笑索題句

與守坡別一年得怡雲方伯手書并示近詩
知由楚入都已就道矣又兩月不至卽和送
行原韻寄懷

經年判一別安訊巧相違夢逐謝公屐書傳萊子
衣征鴻纔北嚮蟄燕未南飛來往紛何事區區笑
所依

頃見南來說征帆信尙違
衡雲遮浦雁梅雨點春
衣短鬢誰簪盍長風獨馭
飛勾留更何事那得道
因依

塵土歸途暗鶯花舊約違
春心憐寸草淚眼記殘
衣六月眞成息三年竟不
飛何因久留滯待得暫
相依

放手親知散低頭壯志違
當歌慚白雪適館敝緇
衣天末晨星遠江干舊雨
飛仕貧良不惡在德信
神依

讀唐宋諸家詩率成長歌

言之不從謂不义全义郊島皆詩祇元精刻鏤混
沌死開明夜吼昆侖搖韓公騎箕下南斗上司喉
舌扶天杓麾斥百怪各儀舞騰身汗漫歌咸韶廟
堂萬祺獨展拓鼻祖甫白還從祧元和長慶體屢
變自鄙而下音聊聊尙愛昌谷麒麟兒野春古豔
生空繆彩虹囊括駉驢背唾花碎繡皆雲綃後來
六一頗振拔能以雅健當韓豪半山老狐大姦黠
詰屈自是資其驕西江宗派復橫溢瓣香迺爲涪
翁燒大戟仙伯游逍遙頗黎秀綠浮眉梢岷江東
下不肯住蕩氛礪垢驅夔魑退之驚笑子美泣汗

流觀靦鞭張晁細雨騎驢劍南老後勁猶欲追前
茅吁嗟此道誠足尙筆不能達意自標圖書典誥
彖象爻琴瑟鞀磬笙鏞箏辭嚴義秘音磽聲濫觴
雅頌流風騷太空萬古轉天籟何有眾竅之調刁
東山之胸西山腠百年消息汐與潮玉丹金漚不
足貴况迺鹿鹿連雕尻零星碑版蝕風雨新聲靡
曼爭娥媼分明呼白誰得梟歸去來兮歌且謠

夜坐見螢作歌

畢月之精畢逋尾不能爲神下爲鬼陰緣壁角拾
蟲豸先張之弧反射矢前驅怒臂立倚倚倒控矛

又搖股髀買勇欲學常山蛇
甘人觸之血流指范
則冠而蟹有匡隱頤縮腹形獨傀
母背僨裂子始
蕃蝮蛇藜藜同一軌周公怒命赤友氏
迺復逋逃
過淮水至令子美終夜愁不信退之
照壁喜乾坤
生化德泰大么膺蠕動力相抵吁汝
無知小蟲子
何獨跳跟自速死守宮脈脈盤牕櫺
笑看膏汝賣
入市

廟市賣蝎藥
搗蝎膏爲之

聽琵琶

別恨羈愁兩逼真
勞勞誰是可憐人
樹頭啄木渾
嗔客花底流鶯自怨春
紅袖歌雲催白日
青衫淚

雨暗緇塵輟雷一撥空堂寂好借迴帆問去津

夜坐有懷寄家人用昌黎韻

眊眊落記室炎歊烝紙牕入幕燭豔豔打衙鼓逢
逢消息斷鄉邑聲稱謝家邦彳亍走風雨沙埃日
春撞心源塞智井腕力隳豐扛懷人淚垂四抱影
愁空雙飽死笑方朔柔存師常撝悠悠閱書史茫
茫沂濤江饑飈伺鉛槧獵螳喧旌幢細泉咽火鼎
流魄斜星扛腸車轉曲棧腹雷殷空缸倦書印風
簞耿夢然花釭嬌兒玉頰瘦老僕霜眉龐曰歸計
未得旣見心則降塵海積塊北肉山羅膾肱眩目

失駛景厖耳爭紛哢逝將逐風列高舉從老龐豐
年報土鼓朋酒攜羊腔叱牛臥荒阪狎鷗浴淺瀧
鋤雲趁麗霖采山入崆嶒漁煙下葦籊風棹纜柳
椿一笑百感釋萬古東流淙

憶南湖

止水閒雲寄此身袖中攜得五湖春文鴛繡鴨渾
相識還仗南湖作主人

一笑相留看海月五年歸計負江神而今底又羈
塵垞湖畔鴛鴦也怪人

愛他百頃芰荷風晴自夷猶雨自濛笑我江源東

入海與人何事大匆匆

一塵蝕盡元亨字入口饑號墨突煙笑指南湖作
衣鉢維摩香積好隨緣

立秋

何日是歸期情先去雁馳霜碁千里月簾笈九秋
詩別夢涼雲覺新愁夜雨知候蟲鳴自喜偏欲近
簾帷

夢雨迷巫峽愁雲塞具區一年京國住兩處信音
無苦蕙含湘的寒華抱鞞不生衣更何用分付酒
家胡

得家書口號

淚零慈母手中綫腸斷深閨月下砧祇有當歸無
別語可憐寸草獨何心

食蓮戲作寄任子田

天星明歷歷紫垣鑿白石江風吹團團水官祭蒼
壁穹窿圓影同一漚磊磊落落不盈尺紫貝之闕
白玉堂紅雲倒燭青琳光綠毛仙人下大荒騎翠
虬入銀潢手把青珊瑚種向河鼓旁流落人間萬
萬古花開十丈削成而四方天風何處來但聞雲
子青精香吾聞之吾師服食得不死休糧往往從之

宛在水中沚江妃宴日花正開水樂泠泠奏宮徵
碧綃剪字邀月姊妾魚倭髻垂雙珥珣玕琪樽酒
盞忻然乞我方寸匕雲牕洞房晝不扃魚目斑斑
掛龍耳太乙老仙聞思大士葉葉雲帆渡渺瀰抱
送天上水精子駢頭玉龍兒眸子青如水脫卻古
錦綳換著雲藍綺簸弄明月珠摒擋菁茅甌濂溪
周先生胡爲見之喜不知本是太華玉井之所生
謂是太極元宮三素得六子如何鑿破混沌竅剝
落黃中理束縛苦受兒童愚形模空令婦女訾荷
衣襍襪面如鬼龐眉書客秋蓬矣

九月六日出都口號

也知聚散似搏沙生事無涯意有涯遊子何心甘
白粲歸途信手插黃花絮雲作雪遮車蓋弦月因
風送馬撾猶有虛囊誇逆旅隨身蠹簡舊紅牙

南歸連日大雪守陂壘聚星堂韻見貺繼和
一首奉酬

又見吳江落楓葉峭帆冷戰江天雪歸來帽側履
亦穿拍手吳兒笑欲絕遲君飛佩同頡頏自詡長
松未摧折一年各作牛馬走百事浪逐雲煙滅巨
觥慰勞忘迭迭更別緒紛綸怕牽掣祇有詩篇如合

支笑多結習還點纈昔人僵臥定何事叩門干人

真不屑艱難奇麗隔年尋偶然指爪纔一瞥

前年曾和

禁體雪詩

也知到家仍浮家可能忘象先忘說新詩脫

口旋書空遮莫撲面飛精鐵

守陂餉山查飲子疊前韻爲報并索和

破寒日進三蕉葉滌除熱惱還嚼雪載歌木桃矢
永好代乞隣醯自笑絕日來腸肚困煎燭夢遊空
想密藕折愛此曲直之精華鑽之色香味不滅煮
以石鼎調以飴并華夜浸朝綆掣柘漿凝碗斲紅
冰流霞照臉生丹纈寒酸嗜好自同同齒牙愛惜

眞屑屑癡兒強索不知味一滴入口幾眼瞥天上
酥陀不可知蜀客糖霜何足說他時煮酒嘗青梅
閒情更好鎔心鐵

積雪凝寒懷守陂客蘇州疊東坡北臺韻

拏音聽徹玉纖纖冷戍荒雲凍益嚴倦客愁眠懷
越被寓公旅食記吳鹽定無撲朔寒偎腳且有芻
尼喜報檐竝望歸飛清獻鶴好憑問訊蜀山尖

近得

虛谷太守信約
歲內可還樵李

卜宅頻看屋上鴉不嫌家具少於車冷官衣上裁
峒月羈客懷中鄧尉花喜迫灰堆聯好夢還邀泥

飲過貧家禦寒笑指詩囊在卒歲無衣手自義

哭傅玉笥先生

海山兜率總蒼茫絳帳虛明太乙光兩世貧交尊
老輩廿年後進拜孫行病翁長與青山冷窮子來
歸白社荒誰使夢中呼起起露零書帶有餘香

可憐少賤兼生晚猶及循牆見老成圯上再來空
躡履浮邱一去悵吹笙多壽石垂金龕乙乙寒

芒耿木精

用東方曼倩事

忍向西湖問山水醉翁行處總

淒清

先大人集中有蔡祠廢營殘陽初月四詩外

舅曾屬和并令汝璧亦追步四首

盡日靈風吹古邱支離桂棟冷煙浮臥牛礪角自
驚起拱鼠銜髭時出遊土鼓喧豳聯小社雲車恍
惚降虛樓野人匭飯猶邀福杯琰陰陽識鬼謀祠

氛祲全銷豹帳移太平饒吹憶旋師縱橫壁壘餘
形勢颯爽風雲閱歲時馬勃秋深流碧火苔花雨
蝕臥虬枝椎牛醺酒歌呼處牧笛閒閒指路岐營

影薄虞淵尙未沈蒼蒼山木遠留陰一痕早上歸
鴉背千里猶懸渴驥心大漠平看雲磧迴孤城斜
見斗杓臨更宜倒載高陽路拍手攔街笑語侵陽

天罍斜開玉宇清
煙埃耿耿尙韜明
望穿屈戌微分影
送去纖阿始下更
涼露初零留客醉
遠山薄暈趁人行
青天碧海愁多少
桂葉新芽便有情

月寫

祀竈詩

臘廿四日三更初元雲一朵當吾廬
云竈之神朝帝都
家家漑釜飭中厨
餽飭盤花紅綠俱
豆砂麥麩鹽蘆菹
甘有錫櫟苦有茶
與奴白飯馬青芻
平頭媚竈捫衣趨
厨孃退避西南隅
奚古祀典老婦需
黃羊白雞猪首臚
禮有從俗還從吾
挂旗結束當啟塗
東面兩拜陳醴醴
兒童繞屋相揶揄
曰司

命醉誰當扶舁來短檠肩兩枹昔棄牆角今雲衢

冬青柏葉中庭鋪旋下束緼難薪蘇

吳俗送竈以舊燈檠縛兩

竹筴爲肩輿雜錢楮燒之云祈福也

轟騰爆竹驅夔魑照耀虛耗竄

鼯鼯神官染面森蚪鬚蒼龍黑螭前躍躍羊角風

起紅饌餉天雞呢嚶天星疏地行賤臣山澤臞惟

大司命父母且額塌沙土口吮嚅寄牋手版請識

諸東鄰詩人老且愚枯腸漚酒追亡逋西鄰經生

守醬瓿逐貧不去觀餅居聰明利市不可圖而我

願嚮常區區考槃擊壤容歌呼瞪瞪誦誦無處無

敢云豈弟神所俞先生詞訖神盧胡紫垣誅蕩高

而虛年頭春腳隙裏駒陽阿晞髮神歸乎

銅梁山人詩集卷第二

渝江王汝璧鎮之

試燈日守陂見過留飲抵夕別去案頭有六
一嘗新茶呈聖俞詩用其韻奉簡

疆歡無謂坐達旦日高濃睡驚呼茶先生高興便
過我熟客到座兒童誇年頭一別忽旬日巨壑雷
動初蛻蛇一年心事又墮蟬暫時笑口開吧呀酌
君舊臘所餉酒春盤雜簇冬筍芽豈惟澹泊適心
賞直拚酩酊歲華農祥晨正啟青鳥蘭卜夜祝
迎苑窠此邦信美寓公耳風物尙戀桑禾麻陽春

暖律入歌詠醉墨揮灑隨欹斜風人瑣屑吟蟋蟀
瞿瞿良士聖所嘉職思不廢及時樂吾生那可窮
津涯無根白日趨虛景有情短檠生夜花幾堆未
掃牆角雪半輪纔動月窟蟾清光出戶送君去欲
摹好景空咨嗟作詩誰暇論藩閫幸不叅雜兒語
哇

留任子田

昔年未識任公子好詩一句兩句在入耳所嗟道
遠莫致之忽喜伊人在秋水涼風八牖君適來一
片瑩澈清無滓自慚綆短難汲深乍快文章識緣

起自從識得君一別往往周星紀一年分手垂虹
亭去馬來牛榜船尾一年攜手踏槐市均堂濺濺
暴頤鯉羊腍熟幾時歲序周復始春雲翳碧落寒
花發黃裊誰使君來助我喜君故不支離我亦不
恢嵬夜坐輒至卯嗒然但相視樂歌饒吹數十章
撻金戛玉應宮徵讀罷長跼言願投吾師事于子
掉頭不謂然吾暇乎哉聊爾耳四十四萬金石編
三千三百經曲禮吾儕兩耳目所及何異太倉一
糠粃自笑說子而未能三年不學則何以便當掘
書去卜鄰巢畏壘冥搜入穹窿細索積黍粢造化

徒拘拘吉祥自止止二十男兒何所憂滄滄涼涼
未移晷柰何舍我去又送蒲帆逐清駛離緒無停
機腸轂安能柅不如鵜與鰈骨眼自終始不如蠹
與蟬牙須交斐疊春風卷地各自飛社燕秋鴻紛
莫理去去各閉門得心應手車同軌他年汗漫高
頡頏更上虛空跨綠駟

登煙雨樓口號送子田別

雨外一帆暝雲邊獨鳥飛嫩寒侵網戶別夢落漁
磯

鴛鴦今昔夢楊柳去來思盡日無言處盈盈水一

規

禽言五章

喚工做活今日不作來日無獲

提壺盧甘酒溺膚馮河溺軀公平慎諸

婆餅不焦婆心焦阿婆焦勞小姑益驕

乞孔乞孔燕雀處華堂牛羊下荒隴

鳳皇不如我我有靈脂治人疾可

蟲言五章

類予類予則類之夫蛾子術之亦各從其類兮

遮了羽脩脩日杲杲執翳來離朱眇

唧唧復唧唧燈青芒角赤天河迢迢當戶直離離
奇奇大星白

冥冥蒟蒻糟邱肉陵五鼎食五鼎烹吁嗟乎營營
瞿瞿瞿促織跼跼不觝而趨而思而居

送守坡北上用少陵贈衛八處士韻

治裝越三載行止日費商及去猶恨速戀茲晨夕
光尋常依枋榆咫尺遇莽蒼春風起羊角鳥道盤
肝腸舉首笑雲翼浮杯泥坳堂安得北飛魚遠逐
去雁行春歸亦遲遲溯洄水一方流連滯嘉詠
齒罪瓊漿信能慰朝飢又何求稻粱平生萬里心

紆迴一舉觴羈懷遠山積別緒春波長踟躕已忘
言流景何浩茫

浙江風泊

鳳凰高騫披我出天風浩淼雲滔滔轡車捆載達
江滸漁童攜襍登輕舸維時定山鐘罷午餘瀾鬱
屈還怒呌海風忽當湖尾立黑雲一握驅銀濤往
來衝突不相下兩厓牛馬聲嗷嘈天吳少魴風伯
勝雪然萬騎奔長旂鯨牙高摩擘岸起坐覺萬瓦
皆浮泡詎有三千六百鈞遠山疊疊如連鰲烏篷
合沓眾助譟纜者蠻觸帆激謫我舟交廻賀撐探

旋澗拍浪猶敗瓢那能挂席濟滄海且可安枕依
江皋小時舉足輕萬里有如强弩纔離朔竭來遊
倦意亦倦何異竟日咀空螯旣非銜命山海國往
禦魑魅驅鱷蛟亦非泛槎牛斗渚手抉雲漢斟天
杓書生意氣可詔笑乘桴好勇空訴調祇今履險
纔一快甯似聚族安鳩巢饑兒乞米向天末遲遲
意緒紛勞忉船唇久手意先往雲峯天外相招邀
向人婉孌自媚妙絕似倒暈眉新描更有鳴禽破
岑寂溪風夜唼林朝嘲羊裘老子舊相識同君亦
復成久要山翁八九皆老醜蒼顏綠髮晴如貓相

期採藥入深谷掉頭長謝非吾曹千秋事業在門
內那羨槁木藏山椒饑寒齷齪何足道丈夫落拓
終折腰

富春雨泛用謝康樂韻

峭帆轉江山曉煙別城郭密雨散清漚溼雲蔽藂
薄連岡蛙黾跳長風馬牛錯孤蓬如網罟壯觀亦
溝壑冥默生繁憂瀕瀚聊棲託山風增薄寒遊子
感孱弱未贏三月糧詎有百金諾努力事遐觀羈
心忽中落打頭笑榜人布指慚屈蠖

家章伊明府邀遊文昌山索詩紀之卽以留

別

千山蜿蜒如鬥龍鬱勃跌蕩不可蹤山城如斗落
井底石湍日夜驚碣礪童童頑礦少意思其不猶
劣皆龍鍾神靈歆歔苦全蔽夸蛾賈勇難爲功山
雲遮我十日住心腸翦翳多粵竿蠻煙瘴雨日搜
攬紙牕墨色號枯樅峭風侵肺作寒熱烝嵐染面
成盲聾有時躡屐踏蹻瓜自笑卻走如驅蛩詎無
佳人在幽谷野翁終老嗤章縫吾家大令具勝槩
好事頗類玉局翁謂言文章此蔭鬱繁星粲粲煙
濛濛幽尋一逕入鳥道手扳幾朶青芙蓉孤雲四

角自融結環中得此一畝宮權輿意匠費經畫量
分俸入爲鳩工已聞栽竹齊萬个更喜拓地規數
弓剗磳雲霞煥金碧遮羅星斗歸房櫳元精炳焜
照下界邦人自此開屯蒙松花被徑山霧曉褰衣
士女爭昌丰我來適值新雨後山田日暖啼鷓鴣
畚人朴陋自力作官蛙叫譟相鳴訶陂陀登頓踏
錦石小鱗五粒青蒙龍振衣直上一千仞羊角料
峭摩蒼穹遠招近揖不暇給冷然兩掖搏天風一
溪無聲掣飛電千家聚落屯深壟頽雲欲雨且不
雨殷雷山腹驅豐隆流泉滢滢遶階甃尺地恐與

天池通由來人事有窮達神物顯晦將母同茲遊
澹泊致足樂後之視昔情何窮作詩紀勝後錄別
歸雲天外猶萍蓬薄寒日夕感遊子新月皎皎流
天東

病痞日外舅過問攜示近詩并貽貢茶 賜
藥欣然成詠

百毒朝朝助苦吟好求翁罵作砭箴頭綱乍閱紅
紗茗上藥兼分紫萼侵漫與詩篇眞卻病老來兒
女最關心葱湯麥飯慚供給還喜扶鳩過蔡沈

宮怡雲先生餉酒及綠茶小詩寄謝

綠茶出蜀
玻璃江

鄉蔬盈匊酒沾巾嘉惠從知老輩眞吳釀到齊還
到蜀溪毛非組亦非綸蟻衣細蹙玻璃色眼纈遙
憐麴米春他日秋庭侍盤饌更斟菊酒膾絲蓴

外舅見和前詩疊韻賦呈

翩翩雙燕感羈吟覽取鶉衣賴引箴五秉那煩分

冉有三年祇笑悅曾參

周公明宣事

纏綿不盡絲蘿累

教誨甯知果羸心惶愧鰕生活升斗渴來漸解辨
浮沉

怡雲先生和前韻寄示再呈一首

不衫不襪不冠巾踵息眞人祇率眞獨喜長頭來

問字更因叔記去垂綸玉池水滿自消暑茅屋風
清時買春五載萍居懽接巷不嫌留滯爲湖蓴

再疊前韻柬虛谷太守并懷守陂需次都門
親滌中裙正葛巾迴車折坂見天真久聞烏鵲環
遮轂多謝陽鱗暗披綸襦袴遺安三萬頃希韞上
壽八千春施看借冠還迎郭那便烹鱸自芼蓴
倦遊自笑墊烏巾交照多君意氣眞鵝鳴歡呼隣
杜甫弟兄輩行厠盧綸見盧允言詩問羊客去心如石
夢草吟餘氣似春遙待佳音報黃耳到時正好擷

秋蓴

題崔鐔子母猿圖

崔郎畫史稱美人朝雲暮雨顏色新紛紛人孰知
正色只恐獼狙長笑猿公嗔俄而右臂化猱子五
日一石十日水畫水不深石不怪斷斷嚙咋猱不
喜水中有月人不知蒼崑偵伏蹲而娛陀羅臂似
飛瀑垂月亦不肯上山亦不肯低金波上下合與
離眼睛光活如波斯盈盈含睇不盈手背上團團
月如斗連尻結股脫襠兒舉手招月月生肘不知
暮四忘朝三噫嘻水晶宮闕雙玉盤黑雲峯森睡
驪靜石骨崩崩神珠寒我訪大山宮

謂守

坐對方

丈雨陰蘿冥冥如有聲恍在瀟湘之南洞庭渚我
本巫山人識此醉道士三聲啼罷月夜分十二峯
頭長孫子何須淚霑裳已覺月落几可笑李太白
采石磯邊月空碧復有柳柳州桂嶺瘴來王孫愁
甯知此公弄月一千歲劃然一嘯歸林邱宮孫爲
我言肯爲作歌許借觀綽虐顧我仙人頑在我猶
在子此理甯非天詩成大笑攫而走宮孫挽袖進
大斗是時缺月下鬼柳相視而笑遂相與爲友

夏夜歌

雲峯入壑青天高饑飈撲撲巡黃茅黃昏無風黑

無月天河半落星勞勞偏袒生羅藉苔蝨別院松
風吹石溜漆燈一點流牆陰玉露闌珊下清漏涼
煙不動鋪桃笙蠟珠翕赫飛祥鵬繁憂鬱悵不成
寐蚊雷逼耳啼嬌嬰花蟲不食古糟粕鐵鎚年深
吐芒鏹夜闌時作金石聲驚起天雞鳴膈膊

讀山海經

坐遣三庚伏還尋二酉藏神州懷帝禹蕃譯凜天
王怪入兒童篆祥生日月光由來天外事殊未盡
荒唐

納涼

蕙風吹暗綠荷露落輕陰卽此成幽賞因之寄遠
心褰衣看紵縞仰面數辰參不覺涼生掖裴裒月
上簷

月夜詠懷

明月不辭影竟夜不可卽朱絲不藏聲再鼓聽愈
默契虛如有餘移情究何得光風煦流萍淥水生
顏色生小屬斷蓬百年猶弱植撫膺念前修游神
矚四極結想將焉窮瞿然思所職

觀樵李寶會用老泉水官詩韻

當夏積潦陰陽之氣有沴鄉曲愚憇史巫

紛若迺相率釀金寶饌像鬼而娛絝嬰兒
於幢以爲戲珠玉繡組雕繪瑰奇之飾竭
蹙羅致爭相夸炫邦人士女仙仙盱盱相
望于塗予怪焉詢之鄉人耄老者云吳越
人歲時率以爲常不足異也夫非禮則誣
誣神者非福誰其尸之其或吐之矣爰作
是詩以示扶俗微意云

南人習尙鬼事鬼欲勝天朝載鬼一車暮送鬼一
船邇又賽鬼伯曉鼓來洲洲偃僂各南膜戢戢頭
如鼉不知道何語侏儒舌濶翻廣衢百戲陳炫晃

堆煙鬢誰家玉顏兒
暝坐十丈蓮尋橦舞都盧
緩吹歌綿蠻靈衣何披披
左右馳星旛鬼吏新染面
拱手各抱拳鬼卒來打街
劣如出水鱸市人走若狂
有力不可扳萬金聚一餉
百寶不媚川家人亦皇皇
滿注茱萸煙我來亟止之
猥言命所關吁嗟古祀典
一一存簡編鄉讎有磔攘
土鼓無凶年神道詎可誣
貨利歆誠難豈弟神所勞
不繫元與禪作詩質正直
辯者其來前

暑夕

飄風不成雨落日猶在樹
青蟬零落鳴殷雷湖外

去幽蘭有悴容倦鳥無高翥
疊疊生秋霞剗剗蛻
花蟲煩疴遣疏曠靜念謝馳
驚坐忘時自驚感深
意轉裕美人望不來冉冉空
煙暮

雨餘用謝康樂韻

金風猶在伏秋氣尙未顯過
雨含華滋輕陽泛紅
泣新蟬集池林好鳥下庭
峴端居撫物候昔夢復
遐緬炎風日驅趨蹇足自輾
轉泥途浩縱橫厲揭
昧深淺退飛還迷方流雲自
難卷百端忽填膺五
色紛亂眼轉蓬未暇安羈羽
詎能展適意乍可欣
忘言欲誰辨及茲風景清庶
令煩憂遣

六月晦日喜雨

雷聲殷煩壤海氣振幽繆旁礪金猶伏蒼茫火欲
流笙鐘酣雨腳鱗鬣睖雲頭大澤潛驅旱今年喜
有秋

七夕和昌谷韻

果然天外事茫惚使人愁纖月不照地流螢時上
樓暗光零砌草微響動簾鈎浪喜從兒女桐風自
報秋

普耳團茶

箸裏輪囷手自捫螺峯深翠結雲根信如蹙縮羣

牛臆疑有迷離玉兔魂
嬖女按掌尤密緻
酪奴風味尙溫磨
從教不入君謨譜
團鳳盤龍底足論

素心蘭歌

秋風一夕吹眉綠
玉露星星浣纖縠
更無人問空谷
蘿絕代明珠耿幽獨
翠鬟星的立踟躕
暮煙如水涼生膚
寸心宛轉機上素
區區何用貂襜褕
好風消息過張碩
環珮無聲遠天碧
五銖戍創垂雲衣
冷月分明下姑射
谷風習習香揚揚
不因邂逅生容光
同心綰結委蕉萃
離離蔓草含孤芳
不矜奇服庸何傷
南陔雅韻傳笙簧

瓜燈歌

細剝犀瓢鏤蟬翼銀甲金鋸好雕飾偷取仙人一
寸光照作千年古鐙色海雲扶月頭上生滿堂美
人皆目成煙蛾倒暈玉腕碧藍葉盈檐空復情贈
我琅玕大如斗員嶠壺天落吾手嬌兒稽首琉璃
王鉢底蒼龍抱珠走忽爾花缸不照席暗光著人
吹玃璫西明紺袖背秋煙冷燄朧朧聚陰閨從教
解放囊中螢鎮心照字尤惺惺吳娥巧奪彩蟾魄
汗青愧我空乞靈匏瓜瀟落不可食笑對秋河織
女星

和士會兄絡緯吟

荒庭刺促秋聲苦七襄風露零如雨呢呢怨語未
分明軋軋機絲費覩縷丁丁唧唧長知更槭槭颯
颯斷續鳴左旋右轉旋轉聲柔腸寸寸千迴縈一
部清商夜蕭蕭翹音爲羽股音角小聲啁哳緒風
吹指撥依希寡女絲洞房纖月浩無主牆角燈檠
花放時煙寒露重忽變徵鮫女投梭夜中起無情
縑素空有情死央濃睡懶不驚錦字何人聯雜組
瑤井玉繩已如許芳草王孫愁奈何遮莫昔昔相
和歌

九月士會兄行役江右汝壁亦饑驅入吳襍
被亭皋淒然暮雨匆匆分手不能爲懷比至
吳門鹿鹿酒場心事俱廢中懷怫鬱不足喻
人枕上得句以寫我憂不知山雨江船愴懣
增歎更當何似也

錄別不能成一語澆愁漫說倒千觥他人那得如
兄弟世事何嘗有性情强笑風天慚贅壻銷魂雨
夜感饑僮已判兩月無佳句夢草多應也瘦生

日日四首懷士會兄

日日上橋頭凝竚不能走片雲天南來下有歸帆

不

日日臥齋閣不寐聽流喝寒雲曙紙牕喜鵲噪朝

闌

日日看天色莫放寒飈吹阿兄行無衣解衣甯有

誰

日日坐繙書古人與我獨燈花待君歸煌煌共宵

讀

贈徐畫三

徐生純明白玉璞

六一句

樂哉綦綰城東門近牀紡

車耿夜火堆盤瓠葉明朝噉蜿蜿滿壁饑蚓走閣

閣兩部鳴蛙蹲蓬頭凍肝八九輩聲牙生澁頰目
暖口頭盤詰手指畫鞭其後者前車掀先生糠覈
笑經笥細君腰襜寬袪袷伊唔伊鴉兩相和數間
破屋清而溫樂哉徐生永弗諼婦能養姑潔蘋蘩
父爲析薪子負擗讀書積善無憂煩門前長水波
汙汙便似千里淮肥奔天翁有意洪其源暫令悶
瞿天池鯤幾時不見予心智轆轤斷綆無潺湲忽
來叩門喜刮目朝食未飽不及殮瘞者忽肥若有
得乍疑衣帶皆蘭蓀果然袖中新著紛披薺葉
飛繡帑謂言一歲之所獲有如納稼登嘉廩才豪

往往見圭角緣情亦復多
嬋媛愛君磊落自振拔
不屑啁晰同鳴鵠從來寶
礦雜砂礫參天古樾毫
末芘抑聞變化在啄菴况
乃毛骨驚雛鵬而我頑
鈍多塵根索居陋室如戴
盆愁緣枯桑抱黃蘗蠢
蠢萬慮勞營魂東塗西抹
何所樂朝唏暮喈誰與
論上堂但奉方進履對客
還著相如禪書叢偃蹇
日月除憂來無端不可捫
多君鞭策起駑步獨嚴
鞦勒麾幢旛礫毛盛氣夸
背距袒裼大叫呼樗櫟
笑予嗒然肘拄座玉丹未
得空吐吞怪底初平兀
如石寒夢遠落潯與湓霜
飈獵獵攬臆戶擁衾苦

憶寒江舫

時家兄客江右

硯田蕪穢久不薙冷落三徑孤

清樽他時乘興趁歸棹踏雪共訪梅花村